

- **Անաքսիմանդրոս** (Anaximander, յուն.՝ Anaximandros, 611 – 546 մ.թ.ա.). ծնած է Միլետոս եւ եղած է՝ Թալէսի աշակերտը, Միլետեան դպրոցին մէջ: Անաքսիմանդրոս եղած է առաջինը, որ իր ժամանակուան բնակելի աշխարհի քարտէսը պատրաստած է: Ան եղած է յունարէն „Kósmos“ (Տիեզերք) եզրի առաջին գործածողը: Անաքսիմանդրոս *անսահմանը* (յուն.՝ apeiron) կը համարէր որպէս հիմնական նախանիւթ, որմէ յառաջացած է ամեն բան:
- **Անաքսիմենէս** (Anaximenes, 585 – 525 մ.թ.ա.). ծնած է Միլետոս եւ եղած է՝ Անաքսիմանդրոսի աշակերտը: Անաքսիմենէսի համաձայն հիմնական նախանիւթը՝ *օդն* (յուն.՝ aēr) է, որ խտանալով կը վերածուի՝ ջուրի ապա աստիճանաբար՝ հողի ու քարի եւ նոսրանալով կը վերածուի՝ կրակի:

2. Պիլթագորական դպրոցը

հաստատուած է Կրոտոնի (Croton), հարաւային Իտալիոյ յունական մասին մէջ, անոր հիմնադիր *Պիլթակորասի*⁽⁵⁾ Կրոտոն հաստատուելէն քիչ ետք (մօտ. 530 մ.թ.ա.): Ապա, այս շարժումի տարածման որպէս արդիւնք, մօտակայ քաղաքներու մէջ եւս կը հաստատուին նմանօրինակ դպրոցներ, որոնց համադրողը եւ ընդհանուր տնօրէնը նոյնինքն Պիլթակորասն էր: Պիլթակորասի մահէն ետք, սակայն, թէեւ այլ Պիլթակորականներ կը շարունակէն իրենց ուսուցչի գործը, բայց կը պակսէր նոյնինքն համադրողը: 5-րդ դարու կեսերուն Պիլթակորականներու փիլիսոփայական շարժումը կը տկարանայ եւ դպրոցները կը փակուին: Վերջին դպրոցը, Տարենտի (Tarent) մէջ, կը փակուէր մ.թ.ա. 4-րդ դարու կեսերուն:

- Իր անունով կոչուած այս դպրոցին եւ փիլիսոփայական շարժումին հիմնադիրն է **Պիլթագորաս Սամոսցի** (Pythagoras of Samos, յուն.՝ Pythagóras, 570 – 500 մ.թ.ա.), որ ծնած է Միլետոս քաղաքէն ոչ հեռու, Սամոս կղզիի վրայ (Փոքր Ասիոյ արեւմտեան ծովափին): Իր օրով, առաջին անգամ կը հանդիպինք յունարէն „philosophía“ (փիլիսոփայութիւն) եզրին: Նշանաւոր փիլիսոփան միաժամանակ ուսողագետ (մաթեմատիկոս), աստղագետ եւ բարոյախօս մըն էր (այս մասին դեռ պիտի անդրադառնանք հետագայ էջերուն մէջ):
- **Փիլոլաոս Կրոտոնցի** (Philolaos of Croton, յուն.՝ Philólaos 470 – 399 մ.թ.ա.), որ Սոկրատէսի ժամանակակից, յայտնի պիլթագորական մըն է: Իր մտածելակերպին պատճառով կը նկատուի՝ նախասոկրատեան: Ան երկի մը մէջ ամփոփած է Պիլթագորասի ամբողջ ուսմունքը: Իսկ իր գլխաւոր փիլիսոփայական գաղափարը կը կայանայ «անսահման» եւ «սահմանաւոր» իրերու հակադրութեան մէջ:

(5) **Պիլթակորասի** (յուն.՝ Pythagóras, 570 – 500 մ.թ.ա.) մասին, տես՝ նաեւ էջ 49: